

Idea per in hotel niev en Bogn Tenigia

Ei dat in'idea per in hotel niev sigl areal dil hotel Bogn Tenigia en Val Sumvitg. Quella deriva da *Tamara Deplazes*, *Fabio Tuor* e *Silas Deplazes* da Surrein e Sumvitg. El rom da lur lavur da project alla scola media professionala a Cuera ein els sefatschentai digl object vegl. Enstagl da far ina proposta co ins savess renovar lez, han els denton mess sin meisa in'idea per ina baghetg niev. Els han buca mo sviluppu in concept persunter, mobein era malegiau plans detagliai e fatg in model. Lur idea ei in hotel cun spa ed infrastruttura per bogns curativs, terapia, fitness, restaurant, localitads per different diever sco era combras e suitas. Ina calculaziun da cuosts han els denton buca fatg. Sco quei ch'els constateschanen en lur lavur ei igl access al hotel medemamein ina gronda sfida.



Visiunari e creativ: Fatg in reset cul hotel en Bogn Tenigia

Il hotel Bogn Tenigia en Val Sumvitg ei buca mo bandunaus, mobein era decadents. La speranza ch'ei detti enzanua enzatgi che spendri igl edificci ei plitost pintga. Tamara Deplazes e Silas Deplazes da Surrein e Fabio Tuor da Sumvitg ein sefatschentai digl object en lur lavur da project alla scola professionala. Els proponan da spazzar igl existent e d'ereger in niev hotel cun porschida era medicinala.

Hans Huonder/FMR

«Nus essan carschi si ella vischnaunca da Sumvitg e mintgin da nus sedumandava passond sper quei hotel vi: Daco ei quei tut serrau? Tgei ei schabegiau? Sa co ei ves'ora endadens? A tgi audan quels stabiliments? Ins haveva udiu bia, cuortas episodas dils parents, mo massa era in misteri», dian ils treis absolvents dalla scola media professiunala tecnica a Cuera. La primavera 2019 han els surdau lur lavur alla scola sco lavur da project interdisciplinara. Dapi lu ei quella stada el tschelau: La documentaziun en truchet ed ils models deponi bein sut cozzas en. Presentau lur gronda ed interessanta lavur han els era buca alla vischnaunca da Sumvitg ed als possessurs dil hotel. La FMR ha giu la caschun da mirar ella documentaziun.

Bogns curativs e terapia

L'idea ch'ils treis scolars proponan cumpeglia da spazzar tut igl existent e d'ereger in niev hotel. La part principala el liug nua ch'il vegl sesanfla ussa, pia leu nua ch'igl areal porscha la pli biala survesta. La purschida duei cumpigliar bogns curativs, purschida da spa, pratica da terapia, sectur per cosmetica, center da fitness, combras – era combras per famiglias grondas – e suitas da hotel, restaurant, bar ed ulteriuras localitads per divertiment, Denter auter era ina gronda sala che sa survir per cultura e cinema. Il sectur da bogns cuntegn era in pool per affons, whirlpool ed in grond infinit-pool cun differentas altezias endadens ed ordaviert. L'aua duei derivar dalla fontauna originala. Tut quei duei esser repartiu sin tschun alzadas eregidas conform als basegns era da persunas impedidas. Il baghetg ord betun e lenn duei vegnir construius cun aschi bia material dalla regiun sco pusseivel. *Silas Deplazes, Tamara Deplazes e Fabio Tuor* han construiu in model dil hotel niev ed era in dalla situaziun actuala. Els han malegiau plans detagliai pigl entir object. Igl ei ina documentaziun cumpleta che savess senz'auter survir per in proxim pass. Buca eruiu han els ils cuosts.

Enzatgei resch niev

Fabio Tuor, Tamara Deplazes e Silas Deplazes ein sefatschentai dil hotel Bogn Tenigia da funs ensi: «Nus essan i alla tscherca da documentaziun, cudischs, artechels, discuors cun pertuccai ed aschia enderschiu ina massa. Las damondas essenzialas seigien denton restadas: «Daco vegn ei schau ir en decadenza ils baghetgs «ruina Bogn Tenigia» e co ei la sostanza dils stabiliments oz? Suentar haver constatau ch'igl existent ei en decadenza essan nus sefatschentai e seprofundai en visiuns e fantasias. Nus vein skizzau, creau e designau nossas ideas culla finamira da dar nova veta en quei liug idillic e magnific al pei dalla Greina e spel qual in'aua cun immens cuntegn da minerals nescha.» Sin fundament dalla situaziun han els persequitau in'idea radicala: «Aschia che nus essen sedecidi per in reset ed havein eregiu in niev hotel da cura per hosps, il qual duei denton era esser aviarts per indigens.» Pia ina proposta da spazzar tut igl existent ed ereger leu in edificii niev. El meglier liug da survesta digl areal sesanfla oz il baghetg vegl ch'ei en in fetg schliet stan.

Schanzas e problems

El center da lur lavur ein stadas las damondas: Tgei funs historic ha il hotel e daco han ils bogns stuiu serrar per adina? Tgei pusseivladads dat ei oz? Per in dils gronds problems vesan els l'isolaziun dil hotel lunsch naven dil territori habitau sco era igl access. Ella via stuess vegnir investau considerabels mieds finansials, leutier mesiras per garantir sia segirtad. Bia potenzial vesan els ell'aua minerala, l'aua cun sulfat da magnesium e calcium sco era fluorid. Auas optimala per ina cura. Grond potenzial vesan Silas Deplazes, Fabio Tuor e Tamara

Deplazes era ella natira intacta ed il clima alpin. Las schanzas che lur project savessi vegnir realisau vesan els tier 50 pertschien: «In factur che plaida encunter l'idea ei secapescha la via che stuess vegnir sanada e segirada denter auter encunter lavinas. Mo lu fuss ei era pusseivel da nezegiar il hotel igl unviern. Per nies project plaida claramein il liug idillic al pei dalla Greina cun vias e trutgs sin tuts mauns. Il fried digl uaul ed il ruaus per fugir e serevegnir dalla hectica dil mintgadi e lu naturalmein l'aua minerala dalla Val Sumvitg. Tgi sa sch'ins anflass in investur?»

